

【经文信息】大正藏第 24 册 No. 1497

佛说大乘戒经 1 卷

No. 1497

佛说大乘戒经

西天译经三藏朝散大夫试鸿胪卿传法大师臣施护奉 诏译

如是我闻：

一时佛在舍卫国祇树给孤独园。

尔时世尊告苾刍言：「有破坏戒行寿命者、有断灭善根者，出家难值，发精进心，坚固守护。若诸苾刍等，于佛法中求解脱者，远离一切诸恶苦恼，如佛所说，宁舍身命而趣无常，不得纵心犯其戒律。若人舍命只坏一生，若复破戒，令百万生沈沦恶道。若人持戒当得见佛。戒为最上庄严，戒为最上妙香，戒为欢喜胜因。戒体清净，如清冷水，能除热恼。戒法最大，世间呪法，龙蛇之毒而不能侵。持戒得名闻，持戒获安乐，如是命终时，复得生天上。」

佛言：「苾刍！若犯律仪，譬如盲人，不见众色，亦如无足，不能行道，远离涅槃，不到彼岸。若持戒人成就一切法宝，譬如贤瓶，圆满坚固，能盛一切珍宝。如是破损，珍宝散失；若破律仪，则舍一切善法。先曾犯戒，而后心欲求涅槃，如去眼、耳，对镜照面，何所堪能！」

佛言：「苾刍！女人无信，不可亲近；王恩虽胜，不可恃怙；水沫无实，不可撮摩；富贵无常，不可久住；色相如花，须臾变异；寿如熟菓，不可久停，如急流渡船、如朽屋暂住；宁食毒药，不得饮酒；宁入大火，不得嗜欲！」

佛说是经已，时彼苾刍及诸菩萨皆大欢喜，信受奉行。

佛说大乘戒经

【经文信息】大正藏第 24 册 No. 1497 佛说大乘戒经

【版本记录】CBETA 电子佛典 Rev. 1.10 (Big5), 完成日期: 2009/04/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 伽耶山基金会提供, 北美某大德提供, 佛教计算机信息库功德会提供新式标点

【其他事项】本数据库可自由免费流通, 详细内容请参阅【中华电子佛典协会数据库版权宣告】
